


佛  
學  
入  
門

北京公同圖書館	書名	佛學入門
	書號	961/65
	冊數	—

# 自序

余早年習中韓學頗好世論數年前因讀友人所遺楞嚴經輒悟妙理自此發心立志學佛近年務博覽頗有入海算沙之困日日鑽研略識門徑因輯成是篇名曰佛學入門以餉閱者如來有言自未得度先度人者世之君子其有閱是篇而興起者乎請敬立合掌拿以俟甲子春日蓮午居士識於北京厲次



佛學入門  
自序



# 佛學入門

蓮午居士編輯

## 導言第一

五陰積聚。乃有此身。故首論五陰。因有此身。斯有世界。故次論五濁。身世相對。根塵識生。故次論六根六塵六識。世出世法。不離唯識。故次論八識。身世宇宙。內外性空。故次論五大。世尊方便說法。一乘開三。導茲衆生。此尤爲入聖之階梯。成佛之門徑。故終論四諦。十二因緣。六度。三乘法門。而爲本篇之殿焉。

## 五陰第二

經云。五陰。一。色陰。二。受陰。三。想陰。四。行陰。五。識陰。陰者。陰蔽爲義。又積聚義。故或稱爲蘊。色者。有質狀可言。故色爲有色陰。受。想。行。識。無質狀可言。故受。想。行。識。爲無色陰。或通稱爲五受陰。以五陰皆由我心領納。後方知故也。

云何色陰。謂眼耳鼻舌身五根爲內色。聲香味觸五塵爲外色。又有亦內亦外之色。如地水火風四大種。非內非外之色。如入定時所生色。何謂眼根。謂色爲境清淨色。何謂耳根。謂聲爲境清淨色。何謂鼻根。謂香爲境清淨色。何謂舌根。謂味爲境清淨色。何謂身根。謂觸爲境清淨色。此五屬內。故爲內色。何謂色塵。謂眼境界。如形色顯色表色。何謂聲塵。謂耳境界。如四大種所發聲。非四大種所發聲。俱四大種所發聲。何謂香塵。謂鼻境界。如好香惡香平等香。何謂味塵。謂舌境界。如甜味苦味淡味。何謂觸塵。謂身境界。除色聲香味四觸外。其餘諸觸。如滑澀輕冷熱等。此五屬外。故爲外色。何謂地大。謂堅性。何謂水大。謂溼性。何謂火大。謂煖性。何謂風大。謂動性。此四屬身時爲內色。不屬身時爲外色。故爲亦內亦外之色。又具能生義。故稱爲四大種。何謂入定時所生色。謂入定時所現神通境界。此色非在身非離身。故爲非內非外之色。云何受陰。謂苦受樂受不苦不樂受。苦謂生時有乖離欲樂。謂滅時有和合欲。不苦不樂。謂無二欲。云何想陰。謂於境界取種種相。云何行陰。行具造作流變自然諸義。廣義以言。括上項受想。茲所論者。謂除受想以外。其餘心相應行法及心不相應行法。何謂心相應行法。謂彼諸法與心相應。如觸作意思及上項受想。此爲徧行五法。欲勝解念三摩地慧。此爲別境五法。并其

餘善惡無記等法。凡與心能相應之法皆是。何謂心不相應行法。謂依色心心法分位。但假建立。不可設施決定異性及不異性。如得命根。無想定。滅盡定。無想天。衆同分。生。老。住。時。方。無常等。凡與心不相應之法皆是。云何識陰。謂於所緣境了別爲性。亦名心意。此含兩義。一。包八識。二。即八識。爲能生前四陰之根本。乃衆生受命之元由也。

## 五濁第三

經云。五濁。一。劫濁。二。見濁。三。煩惱濁。四。衆生濁。五。命濁。濁者。渾濁爲義。譬如清水。投以土塵。土。失留礙。水亡清潔。容貌汨然。名之爲濁。此五濁相。依五陰生。依色陰生劫濁。劫者。時分。潛轉爲義。如我有見。見此虛空。彼空無體。此見無覺。空見不分。運運密移。是爲劫濁。依受陰生見濁。見具體用二義。如我此身。現搏四大爲體。因心成體。因體發用。體用互織。能受一切。是爲見濁。依想陰生煩惱濁。煩惱。即無明。因愛。取。生。芸芸衆生。惟根與塵。根塵相偶。念不能離。如蠶作繭。以自束縛。是爲煩惱濁。依行陰生衆生濁。衆生。爲生滅之相。生滅不停。如船無主。生則貪生。死則畏死。時遷業留。輪迴不已。是爲衆生濁。依識陰生命濁。命。爲生滅元由。即衆生同分生機。命元

無異。塵隔異生。始同終異。失其準的。是爲命濁。

## 六根六塵六識第四

經云。六根。一。眼根。二。耳根。三。鼻根。四。舌根。五。身根。六。意根。又云。六塵。一。色塵。二。聲塵。三。香塵。四。味塵。五。觸塵。六。法塵。眼等五根。色等五塵。如上所說。何謂意根。如人勞倦則眠。睡熟便寤。寤塵忘斯憶。失憶爲妄。生住異滅。瞬息不停。吸習歸中。不相踰越。是爲意根。何謂法塵。即此意根。內緣善惡。無記。三性。外緣五塵。謝落影子。生成法則。是爲法塵。

經云。六識。一。眼識。二。耳識。三。鼻識。四。舌識。五。身識。六。意識。何謂眼識。謂因心。因眼。因色。因明。因空。具此五緣。成眼識義。是爲眼識。何謂耳識。謂因心。因耳。因聲。因空。具此四緣。成耳識義。是爲耳識。何謂鼻識。謂因心。因鼻。因香。因空。具此四緣。成鼻識義。是爲鼻識。何謂舌識。謂因心。因舌。因味。具此三緣。成舌識義。是爲舌識。何謂身識。謂因心。因身。因觸。具此三緣。成身識義。是爲身識。何謂意識。謂因有此心。具此一緣。卽成意識之義也。

## 八識第五

經云。八識。眼等及意爲六識。七。末那識。八。阿黎耶識。眼等六識。如上所說。所當區別者。眼及身識。屬於現量。意識則屬於比量耳。何謂現量。現。卽顯現量。卽容量。如眼能顯現色塵境界而容受之。何謂比量。比。卽比較。如眼見色時。意識卽能起而比較青黃等色塵境界而容受之。何謂末那識。此識屬於非量。非量者。非現比二量之謂。如眼見色時。依意識比較結果。遂執已見。定爲美惡。心識之中。悉能容量。此卽末那識之境界。爲生滅根源。人法二我執所以不易破滅者。皆此識有以障之也。何謂阿梨耶識。譯言藏識。能含藏諸種故。此有二義。一。能藏。二。所藏。三。執藏。能藏者。謂能藏善惡種子。俾其歷劫不壞。具持種義。故名能藏。所藏者。謂所藏過去世善惡種子。現在未來。念念均有受薰之義。故名所藏。執藏者。卽末那識。堅執自內我見起諸雜染者也。具執藏所藏義。故有生滅。具能藏義。故無生滅。此爲阿黎耶識之義蘊。若能解此。則可立證眞如而成佛不難矣。

再明八識與五陰相生之義。則眼及身識。能生色。受。二陰。意識能生想陰。末那識能生行陰。阿黎耶識能生識陰。此又行人所當知者也。

## 五大第六



經云。五大。一。地大。二。水大。三。火大。四。風大。五。空大。地。水。火。風。四大之義。如上所說。何謂空大。即除地。水。火。風。四大以外之境界皆是也。此五大中。空爲能生。地。水。火。風。則爲所生。能生爲同。所生爲異。同異發明。乃有衆生。衆生者。生於同異發明以後。而實無同無異者也。何以言之。蓋衆生有色相。故不同於空大。而有知覺。亦不同於地。水。火。風。四大故也。

## 四諦第七

經云。四諦。一。苦諦。二。集諦。三。滅諦。四。道諦。諦。即理也。又審實不虛爲諦。何謂苦諦。苦者。逼切爲義。無常三相。逼切身心。故名爲苦。苦有三種。一。苦苦。二。行苦。三。壞苦。云何苦苦。如疾病。災殃。打罵。訟纏。所求不得。怨憎聚會。皆苦苦也。云何行苦。即一切心法。念念不住。不能自主。皆行苦也。云何壞苦。如恩愛永訣。老死相現。過去樂滅。大苦現前。皆壞苦也。何謂集諦。集者。招聚爲義。煩惱業。合。能招聚生死苦果。故名爲集。舉凡中陰。入胎。出胎。少壯。至於老死。所作一切有爲之法。皆集義也。何謂滅諦。滅者。滅無爲義。無有子果二縛。故名爲滅。所謂空。無相。無作。三解脫門。凡一切無爲法。皆滅義也。何謂道諦。道者。能通爲義。戒。定。慧。能通至涅槃。故名爲道。廣說有無量。

門。略說有三十七品。分爲七門。一。四念處。此四云何。一者。行人初觀內身。膿血雜亂。次觀外身。穢惡充滿。念念諦觀。身皆不淨。是爲身念處。二者。行人初觀內受。憂悲苦惱。次觀外受。寒暑炎涼。念念諦觀。受皆是苦。是爲受念處。三者。行人初觀內心。寤寐生滅。次觀外心。變化遷流。念念諦觀。心皆無常。是爲心念處。四者。行人初觀內法。眼耳鼻舌。次觀外法。色聲香味。念念諦觀。法皆無我。是爲法念處。二。四正勤。此四云何。一者。已生不善法。從今永斷。二者。未生不善法。不令復生。三者。未生善法。令其生起。四者。已生善法。令其增進。是爲四正勤。三。四禪定。此四云何。一者。初禪。入此定者。苦不能逼。二者。二禪。入此定者。憂不能至。三者。三禪。入此定者。得無量樂。四者。四禪。入此定者。苦樂雙忘。是爲四禪定。四。五根。此五云何。一者。信根。謂信佛。信法。信僧。信戒。二者。精進根。謂精進。四正勤。三者。念根。謂念四念處。四者。定根。謂得四禪定。五者。慧根。謂知四聖諦。是爲五根。根者。生長爲義。如樹有根。必能開花結果。學道有根。決定成佛。此則根之義也。五。五力。此五云何。即具前五根而增進之謂。六。七覺分。此七云何。一。念覺分。二。擇法覺分。三。精進覺分。四。喜覺分。五。倚覺分。六。定覺分。七。捨覺分。此七覺分。應次第修習。初修念覺分。念覺分滿足。則能選擇思惟分別。爾時即修擇法覺分。擇法覺分滿足。則能精進方便。爾時即修精進

覺分。精進覺分滿足。則能生歡喜。爾時即修喜覺分。喜覺分滿足。則能身心倚息。爾時即修倚覺分。倚覺分滿足。則愛樂。愛樂已。則心定。爾時即修定覺分。定覺分滿足。則貪憂滅。貪憂滅。則捨心生。爾時即修捨覺分。捨覺分滿足。則身心清淨而梵行立矣。七八正道。正道云者。對邪道而言。此八云何。一者。正見。謂離身邊四見。知人法無我。二者。正志。謂信佛法僧。三者。正語。謂離口四過。四者。正業。謂行十善業。五者。正命。謂菩薩離精氣神。以慧爲命。六者。正方便。謂如佛說法。一乘開三。七者。正念。謂於四威儀中。淨念相續。八者。正定。謂二乘小定及菩薩大定。是爲八正道。此上七門。共三十七品。即道諦之略義也。

總觀四諦。集爲苦因。故欲離苦。須先斷集。道爲滅因。故欲證滅。須先修道。又上所論者爲生滅四諦。此外尚有無生四諦。無量四諦。無作四諦。行人漸次精進。自能深入第一義門。圓滿菩提。歸無所得也。

## 十二因緣第八

經云。十二因緣。一。無明。二。行。三。識。四。名色。五。六入。六。觸。七。受。八。愛。九。取。十。有。十一。生。十二。老死。

何謂無明。無明。即妄心。屬末那識。以依阿黎耶識不覺而起。能投母胎。成業相。昧厥本因。故稱爲無明。何謂行。行。即業。謂造作身口意業。具流動義。故稱爲行。何謂識。識。有八種。首阿黎耶識。此識內轉成智。即見真如本體。外轉成識。則生次第七識。此置行後。可知是指轉識以次而言。絕非轉智之識。是爲此處識字之義。何謂名色。名。即無色四陰。色。即色陰。因無色四陰。有名無色。故稱爲名。色。陰有色。故稱爲色。何謂六入。六入。即六根。謂六根開張。有入六塵作用。是爲入字之義。何謂觸。觸。即對觸。謂六根能對觸六塵。何謂受。受。即領納。謂根塵相對。能領納前境好惡等事。何謂愛。愛。即貪著。謂貪著色法。能生未來無明種子。此是輪迴之母。行人觀十二因緣時。於此愛字。最須注意。何謂取。取。即求取。因貪著故。於諸塵境。廣遍馳求。取而歸己。何謂有。有者。前無後有。因求取故。起一切業。積聚牽引。遂生三界有漏之果。此是有義。何謂生。生。即受生。謂現世作業。後世必於六道受生。何謂老死。老死者。受生已後。此五陰身。衰已必壞也。此十二法。展轉感果。故名曰因。互相牽引。故名曰緣。順觀爲生起門。所謂無明緣行。行緣識。識緣名色。名色緣六入。六入緣觸。觸緣受。受緣愛。愛緣取。取緣有。有緣生。生緣老死是也。逆觀爲還滅門。所謂無明滅則行滅。行滅則識滅。識滅則名色滅。名色滅則六入滅。六入滅則觸滅。觸滅則受

滅。受滅則愛滅。愛滅則取滅。取滅則有滅。有滅則生滅。生滅則老死滅是也。又有三種不同。一者。三世十二因緣。二者。二世十二因緣。三者。一世十二因緣。何謂三世十二因緣。過去二因。謂無明行。現在五果。謂識。名色。六入。觸。受。現在三因。謂愛。取。有。未來二果。謂生。老死。此十二因緣。有三種道。一。惑道。謂無明。愛。取。二。業道。謂行。有。三。苦道。謂識。名色。六入。觸。受。生。老死。是三種道。次第生起。恒爲因果。由惑起業。由業起苦。又由苦起惑。輾轉輪迴。不斷不常。非修觀智。末由覺也。何謂二世十二因緣。現在十因。未來二果。現在十因者。一。無明。愛。因緣故。感果中陰。入父母所。精血成滯。大如豆子。名歌羅邏。初息出入。是名無明。息出入處。爲風道。名爲壽命。又即氣道。是名爲煖。此中心意。名之爲識。二。行。行有多種。約言有三。一。觀息出入。名爲身行。二。以出入息。從覺觀生。故名意行。三。和合出聲。是名口行。三。識。三行。因緣。則有識生。故名爲識。四。名色。著識。因緣。則有四陰。及以色陰。故名名色。五。六入。五陰。因緣。識行六處。故名六入。六。觸。根塵相對。故名爲觸。七。受。觸。因緣。故。念色。至法。名之爲受。八。愛。貪著於色。乃至於法。名之爲愛。九。取。愛。因緣。故。四方求覓。名之爲取。十。有。取。因緣。故。受於後身。故名爲有。未來二果者。一。生。有。因緣。故。有生。是名爲生。二。老死。生。因緣。故。有老死。是名爲老死。如是諦觀。何者是我。若修觀智。必恍然也。何

謂一世十二因緣。一世云者。約現在一念而言。謂眼見生愛。爲無明。爲愛造業爲行。至心專念。爲識。識色共行爲名色。六處生貪爲六入。因入求愛爲觸。念色至法爲受。心生貪著爲愛。求是等法爲取。此等法生爲有。次第不斷爲生。次第斷故爲老死。如是諦觀。內外性空。是即因緣覺也。

上所論者爲思議生滅十二因緣。此外尙有思議不生滅十二因緣。不思議生滅十二因緣。不思議不生滅十二因緣。行人依此深造。自能入佛知見。無師自悟。不求而得也。

## 六度第九

經云。六度。一布施。二持戒。三忍辱。四精進。五禪定。六智慧。六度何以首說布施。因慳貪爲輪迴根本。爲欲對治此慳貪故。又於六度之中。最易修習故。所以先說布施。施有多種。略言有二。一。法施。二。財施。此二種施。法施爲上。財施次之。何以故。因法施有三種事勝於財施故。云何爲三。一。財施者有竭盡。法施者無竭盡。二。受財施者。現在利益。受法施者。現在未來俱受利益。三。財施者能施獲益。受者無益。若法施者則自他俱益。然無論行何種布施。均須無諸過患。謂非求

恭敬利養。非取他財。非嫉妬他。非畏惡名。非求恩德。而行布施。爲利他故。於身命財。勿稍吝惜。是名布施。次持戒者。戒有多種。十戒爲要。何爲十戒。所謂身三戒。口四戒。意三戒。言身三者。謂離殺盜淫。言口四者。謂離虛誑。離間。麤惡。及無義語。言意三者。謂離貪。瞋。癡。此爲根本戒。試申其義。何謂貪。謂冀得非分。或患得失。慳不能捨。或見他尊貴。多饒財寶。即起嫉妒之心。皆是貪義。何謂瞋。謂以己意。嫌惡他人。或被他人誣謗打罵。而起怨害之心。皆是瞋義。何謂癡。謂貪戀五欲。或起邪見。或作魔想。皆是癡義。又持戒者。須存此心。非爲怖畏地獄。求生天上。自願解脫。乃爲普利一切衆生而持戒。如是持戒者。是名持戒。忍辱者。謂知生死涅槃。悉皆平等。無有四相。等同虛空。若人稱嘆。則觀心性本來空寂。不生忻慰。若被譏嫌。則觀本心性離怖畏。不生憂戚。若遇讚譽。則觀自身性無我慢。而不高舉。若遭毀謗。則觀此身猶如虛空。不應加報。若受苦時。則觀法性本無逼迫。不見苦相。若受樂時。則觀實性常住不變。本無樂相。若得利養。則觀此心自性調伏。不生歡喜。若失利養。則觀此心善妙寂靜。不生瞋恚。如是八風不能轉動。即能修行無量忍辱。是名忍辱。精進者。謂身口意。此三善業。必依精進。方能發生。有三種精進。一。直心精進。行如來行。設逢苦難。心不退轉。二。深心精進。聞此甚深如來廣大智慧。心不傾動。三。大

悲心精進。能隨過去諸菩薩摩訶薩大悲之行。依此精進。則無一法不能成就。離此精進。則無一法可以成就。故修餘五度時。皆須賴此精進。是名精進。禪定者。有二種。一爲聲聞獨覺所得禪定。得此禪定者。祇能斷煩惱障而入涅槃。即四禪定。二爲菩薩所得禪定。有十六種。一者。能了達生死而無生死。二者。能於諸禪定不生味著。三者。能起大悲心。四者。能增長正定。五者。能成就神通。六者。能善調伏心。七者。能依無相智。得淨解脫。八者。能寂靜極寂靜。而超諸禪定。九者。能無能燒亂。十者。能對治毀禁。十一者。能入智慧門。十二者。能知衆生心。十三者。能紹三寶。十四者。能得法自在。十五者。能常住不壞。十六者。能徧照一切。禪定雖分二種。然苟能遠離貪欲。瞋恚。掉悔。昏眠。疑。五重蓋。精勤修習。獲深禪定而不味著。皆可由此起五神通。云何爲五神通。所謂天眼。天耳。他心。宿命。神境。智證通是也。是名禪定。智慧者。爲五度之母。從布施至禪定。一一皆以智慧爲其根本。若離智慧。即不能行。如人身有命根。乃能有作。命根謝已。無復堪任。修行五度。亦復如是。行布施時有二種智。一者。小智。求人天二乘解脫。二者。大智。心無所得。無所得故。得佛菩提。以是故知布施從智慧生。持戒亦有二種智。一者。小智。求人天二乘小果。二者。大智。普爲利樂一切有情。不住於相。而無所得。趣大菩提。以是故知持戒從智慧生。忍辱亦



然。一切有情。本智如日。無明覆蔽。忍光不現。修忍辱者。以智慧力。斷除無明。聖智現前。佛日斯照。設遇一切外緣之來。皆可以此正智忍辱而調伏之。住無相忍。廣度一切。以是故知忍辱從智慧生。精進亦然。何以故。若無智慧。一切所作。皆不成就。以是故知精進從智慧生。禪定亦然。所以者何。身口二業。尙易除滅。意業微細。難可測量。如是意業。妄想纏縛。雖入定門。無有智慧。亦難制止。有智慧人。則能微細觀察。此妄想心。念念不住。過去者是我心耶。過去者已去。未來者是我心耶。未來者未來。現在者是我心耶。現在者不住。沈思諦觀。孰是我心。孰非我心。念念深入。諸見清淨。自能三昧現前。入深禪定。以是故知禪定從智慧生。非惟五度從智慧生。一切世間福德名聞人天果報。乃至出世無漏善根。皆以智慧而爲生處。猶如大地。皆依虛空而得安立。所以有此智慧。即可自證菩提。入無餘涅槃。諸漏盡淨。圓滿六通。是名智慧。又此爲實智。復可開爲四種權智。一方便。二願。三力。四智。方便有種種。願即四宏誓願。力即十力。除三爲智。合之六度。共成十度。一一度中。攝一切法。生一切法。成一切法。浩若涇沙。故極六度之用。即是佛法全體。又豈初學所能窮其涯涘哉。

## 結論第十

嗚呼。佛道懸遠。非證莫入。如上所言。不過略釋名義。若欲深造。尙須博覽羣經。信受奉行。方見功效。卽說偈曰。

佛道甚深莫可測  
我今見聞釋名義

若能離此言說相  
是謂得入一切法

佛學入門

2

44308 /